



JUDICIAL **SYSTEM** MONITORING PROGRAMME
PROGRAMA MONITORIZASAUN BA **SISTEMA** JUDISIÁRIU

Sumáriu Kazu
Tribunál Judisiál Primeira Instáncia Suai
Setembru 2025

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru feto no ema vulneravel. JSMP afirma la iha justifikasaun ba kualkér violénsia hasoru feto.

A. Sumáriu prosesu julgamentu kazu iha Tribunál Judisiál Primeira Instáncia Suai

1. Totál kazu ne'ebé JSMP monitoriza : 12

Artigu	Tipu Kazu	Númeru
Artigu 145 Kódigu Penál (KP), no artigu 2,3, 35 no 36 Lei Kontra Violénsia Doméstika (LKVD)	Ofensa ba integridade física simples ho natureza violénsia doméstika no tipu ilísitu sira kona-ba violénsia doméstika	7
Artigu 145 KP	Ofensa ba integridade física simples	1
Artigu 316 KP	Kontrabandu	4
Totál		12

2. Totál desizaun ne'ebé JSMP monitoriza: 12

Tipu pena	Artigu	Númeru
Suspensaun ba prizaun nia ezekusaun	Artigu 68 KP	3
Pena multa	Artigu 67 KP	7
Omologa pedidu dezisténsia keixa	Artigu 262 KPP	1
Absolve		1
Totál		12

3. Totál kazu sira ne'ebé kontinua prosesu tuir JSMP nia monitorizasaun: 0

B. Deskrisaun sumáriu ba desizaun kazu sira ne'ebé JSMP monitoriza

1. Krime ofensa ba integridade física simples ho natureza VD

Nú. Prosesu : 0106/24BBMLV
Kompozisaun Tribunál : Singulár
Juisa : Dra. Patricia Araújo Xavier
Prokuradór : Dr. Reinato Bere Nahak
Defeza : Dr. Jonas Henrique da Costa
Desizaun : Pena multa US\$60.00

Iha 23 Setembru 2025, Tribunál Judisiál Primeira Instánsia Suai, liuhosi julgamentu movei iha Munisípiu Bobonaro prezide leitura sentensa ba krime ofensa ba integridade fízika simples ho natureza VD ne'ebé envolve arguidu MML hasoru nia feen, iha Munisípiu Bobonaro.

Akuzasaun Prokuradór

Prokuradór akuza katak iha 16 Maiu 2024, iha oras tuku 20:00 kalan, arguidu tuku dala rua iha ofendida nia hasan parte karuk kauza moras no bubu. Antes agresaun ne'e, arguidu ho kondisaun lanu sein motivu ne'ebé klaru halo agresaun hasoru ofendida.

Konsekuensia hosi arguidu nia hahalok ne'e rezulta moras no bubu iha ofendida nia hasan, ofendida ba halo tratamentu saúde iha PRADET.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2,3 (a), 35 (b) LKVD.

Produsaun ba prova sira

Iha prosesu julgamentu, arguidu konfesa integralmente ba faktu hotu iha akuzasaun prokuradór nian, arguidu mós deklara katak liu tiha loron rua arguidu husu kedas deskulpa ba ofendida, arrepende ninia hahalok no promete iha futuru sei lahalo tan krime hasoru ofendida.

Alende ne'e, ofendida kontinua konfirma faktu sira iha akuzasaun ofendida deklara katak arguidu husu ona deskulpa no depoisde akontese ofendida ho arguidu di'ak malu fali ona no nafatin moris hamutuk hanesan feen ho la'en.

Alegasaun finál

Prokuradór haktuir katak, arguidu provadu komete faktu sira iha akuzasaun, bazeia ba konfisaun arguidu nian no konfirma mós hosi ofendida, prokuradór haree katak arguidu nia aktu ne'e priense elementu krime iha artigu 145 KP, nune'e husu ba tribunál atu kondena arguidu ho pena multa.

Entretantu, defeza haktuir katak iha julgamentu arguidu konfesa totál ba faktu sira iha akuzasaun, arrepende ninia hahalok, foin mak mai hatan iha tribunál no depoisde akontese arguidu ho ofendida mós di'ak malu ona, nune'e defeza husu ba tribunál atu aplika pena kmaan ba arguidu.

Desizaun,

Hafoin halo avaliasaun ba faktu sira hotu, tribunál prova katak arguidu tuku dala rua iha ofendida nia hasan parte karuk kauza moras no bubu.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok no foin mak primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$60.00 ne'ebé arguidu sei selu 0,50 sentavus kada loron durante loron 120. Tribunál mós fiksa pena alternativa durante loron 80 prizaun, bainhira arguidu la kumpri pena multa refere.

2. Krime ofensa ba integridade fízika simples ho natureza VD

Nu. Prosesu	: 0051/25.BBMLV
Kompozisaun Tribunál	: Singulár
Juisa	: Dra. Patricia de Araujo F.B. M. Xavier
Prokuradór	: Dr. Renato Bere Nahak
Defeza	: Dr. Jonas Henrique da Costa
Desizaun	: Pena multa US\$60.00

Iha 23 Setembru 2025, Tribunál Judisiál Primeira Instánsia Suai, liuhosi julgamentu movel iha Munisípiu Bobonaro prezide leitura sentensa ba krime ofensa ba integridade fízika simples ho natureza VD ne'ebe envolve arguidu DP hasoru nia feen, iha Munisípiu Bobonaro.

Akuzasaun Prokuradór

Prokuradór akuza katak iha 13 Abril 2025, maizumenus iha oras tuku 7:00 dadeer, arguidu tuku dala ida iha ofendida nia kabaas parte loos no tuku dala tolu iha matan laran parte loos kauza moras no bubu. Antes agresaun ne'e, ofendida haruka kous sira nia oan ne'ebé tanis buka hela arguidu.

Prokurador akuza arguidu kontra artigo 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigo 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu iha akuzasaun ne'e loos hotu, arrepende nia hahalok, di'ak malu ona no foin primeiravés mai hatan iha tribunál. Arguidu mós deklara katak iha akontesimentu ne'e arguidu ho kondisaun kolen foin mak sai serbisu ho nune'e arguidu nervozu hodi halo agresaun ba ofendida. Depoisde akontesimentu ne'e to'o agora arguidu la komete krime seluk hasoru ofendida.

Depoisde rona tiha deklarasaun arguidu nian, prokuradór husu ba tribunál atu presinde ofendida nia deklarasaun tanba prova sufisiénte ona. Parte defeza konkorda ho pedidu ne'e, nune'e tribunál presinde deklarasaun ofendida nian.

Alegasaun finál

Prokuradór haktuir katak arguidu provadu komete aktu ne'ebé konsta ona iha akuzasaun hasoru ofendida, nune'e atu prevene krime refere la akontese tan iha futuru husu ba tribunál atu kondena arguidu ho pena multa.

Entretantu, defeza haktuir katak arguidu konfesa, arrepende ninia hahalok, foin mak mai hatan iha tribunál no di'ak malu ona, nune'e husu ba tribunál atu aplika pena kmaan ba arguidu.

Desizaun

Hafoin halo avaliasaun ba faktu sira hotu, tribunál prova katak arguidu provadu komete aktu ne'e hasoru ofendida.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena multa US\$60.00 ne'ebé kada loron arguidu sei selu US\$1.00 durante loron 60. Tribunál mós fiksa pena alternativa durante loron 40, bainhira arguidu la selu pena multa refere.

3. Krime ofensa ba integridade fízika simples

Nú. Prosesu	: 0047/25BBMLV
Kompozisaun Tribunál	: Singulár
Juis	: Dr. Samuel da Costa Pacheco
Prokurador	: Dr. Renato Bere Nahak
Defeza	: Dr. Domingos dos Santos
Desizaun	: Omologa pedidu dezisténsia keixa

Iha 23 Setembru 2025, Tribunál Judisiál Primeira Instansia Suai, liuhosi julmentu movel iha Munisípiu Bobonaro, prezide julgamentu tentativa konsiliaisaun ba krime ofensa ba integridade fízika simples ne'ebé envolve arguida AG hasoru nia kuñada, iha Munisípiu Bobonaro.

Akuzasaun Prokuradór

Prokuradór akuza katak iha 02 Abril 2025, maizumenus iha oras tuku 17:30 lokraik, arguida tama ba ofendida nia uma hodi rakut iha ofendida nia faru no lori liman les ofendida nia kakorok kauza kanek no nakles. Antes agresaun ne'e, ofendida ho arguida oin buis ba malu, nune'e arguida nervozu halo agresaun hasoru ofendida.

Prokuradór akuza arguida kontra artigu 145 KP kona-ba krime ofensa ba integridade fízika simples ho moldura penál to'o tinan 3 ka multa.

Produsaun ba prova sira

Bazeia ba artigu 262 nú (2) KPP kona-ba tentativa ba konsiliaisaun, nune'e antes tama ba julgamentu produsaun ba prova sira, juis husu atu halo tentativa konsiliaisaun arguida no ofendida mós aseita.

Iha prosesu tentativa konsiliaun ne'e, ofendida hakarak deziste tiha ninia keixa maibé ho kondisaun katak arguida tenke muda ninia hahalok, arguida mós konkorda no promete iha futuru sei lakomete tan krime hasoru ofendida no ema seluk. Iha tentativa konsiliaun ne'e arguida hamrik hakuak no husu deskulpa ba ofendida.

Alegasaun finál

Prokuradór no defeza apresia akordu dame ne'ebé deside ona hosi parte sira no husu ba tribunál atu omologa akordu dame ne'e.

Dezisaun

Bazeia ba akordu dame hosi parte rua no pedidu dezisténsia keixa hosi ofendida, tribunál konklui prosesu ne'e no omologa akordu dame ne'e no absolve arguida hosi prosesu ne'e.

4. Krime kontrabandu

Nú. Prosesu	: 0008/25.BBATB
Kompozisaun Tribunál	: Koletivu
Juis	: Dra. Patricia Araújo Xavier, Dr. Hugo da Cruz Pui no Dr. Samuel da Costa Pacheco
Prokuradór	: Dr. Reinato Bere Nahak
Defeza	: Dr. Domingos dos Santos
Desizaun	: Pena multa US\$120.00

Iha 24 Setembru 2025, Tribunál Judisiál Primeira Instansia Suai, liuhosi julgamentu movel iha Munisípiu Bobonaro prezide leitura akordaun ba krime kontrabandu ne'ebé envolve arguidu Angelo Soares da Costa no arguidu Carlos Gonçalves hasoru Estadu RDTL, iha Munisípiu Bobonaro.

Akuzasaun Prokuradór

Prokuradór akuza katak iha 19 Marsu 2025, iha oras tuku 11:00 dadeer, arguidu Angelo Soares da Costa hodi konduz nia kareta ba iha arguidu Carlos Gonçalves nia uma iha Palaka-Sanirin tanba sidadaun estranjeiru hatun sasan sira hanesan Coca-Cola dos 10, sprite dos 12, tabaku pohon sagu karton 6, arguidu sosa ho osan ne'e iha arguidu Carlos nia uma no arguidu Angelo Soares hodi entrega osan hamutuk US\$1,232.00 ba iha arguidu Carlos Gonçalves Katak Coca-Cola dos 10 kada kaixa US\$11.00 totál hamutuk US\$ 110.00. Sprite kaixa 12 kada kaixa ho osan US\$11.00 totál osan US\$.132.00 tabaku pohon sagu kada karton ho osan US\$165.00 no karton 6 ho osan US\$990.00 arguidu sosa hotu tia arguidu tula sasan sira ne'e ba iha kareta ho marka Prado kor mutin ho xapa matrikula A.11-681 hodi diriji ba Dili no to'o iha área Manduki hodi hetan prende hosi Polísia sira.

Prokuradór akuza arguidu kontra artigu 316 KP kona-ba krime kontrabandu ho moldura penál tinan 2 to'o tinan 6 ka multa.

Produsaun ba prova sira

Iha julgamentu, arguidu konfesa faktu hotu iha akuzasaun prokuradór nian, arguidu sira deklara katak sasan sira ne'e foti hosi mota sorin mak lori mai iha terítoriu Timor nian, arguidu sira deklara katak arrepende ninia hahalok no sei la repete tan iha futuru.

Depoisde rona deklarasaun arguidu nian, prokuradór konsidera prova sufisiénte ona nune'e husu ba tribunál atu presinde testemuña ninia depoimentu. Defeza laiha opozisaun ba pedidu ne'e. Bazeia ba pedidu ne'e, tribunál presinde testemuña ninia depoimentu.

Alegasaun finál

Prokurador haktuir katak faktu ne'ebé hakerek iha akuzasaun, arguidu sira konfesa integral no arguidu sira prátika duni krime kontrabandu hatama sasan ilegál, nune'e husu ba tribunál atu kondena arguidu sira ho pena multa.

Entretantu, defeza haktuir katak arguidu sira konfesa faktu hotu iha akuzasaun, arrepende ninia hahalok no promete sei la komete tan iha futuru, Alende ne'e kolabora dí'ak ho tribunál tanba ne'e defeza husu ba tribunál fó pena multa ne'ebé mak adekuadu ba arguidu sira.

Desizaun

Depoisde avalia faktu hotu ne'ebé produs durante julgamentu, tribunál konsidera arguidu sira nia hahalok ne'e provadu no priense duni elementu krime kontrabandu.

Bazeia ba faktu provadu sira ne'e no tetu mós ho sirkunstánsia atenuante sira hanesan, arguidu sira konfesa, arrepende nia hahalok, foin primeiravés mai hatan iha tribunál no promete sei la komete tan krime hanesan iha futuru. Tanba ne'e tribunál konklui prosesu ne'e no kondena arguidu sira ho pena multa US\$120.00 kada loron arguidu sei selu US\$2.00 durante loron 60. Tribunál mós fiksa pena alternativa durante loron 40 prizaun, bainhira arguidu sira la kumpri pena multa refere.

5. Krime kontrabandu

Nú. Prosesu	: 0024/25.BBMLV
Kompozisaun Tribunál	: Koletivu
Juis	: Dra. Patricia Araújo Xavier, Dr. Hugo da Cruz Pui no Dr. Samuel da Costa Pacheco
Prokuradór	: Dr. Renato Bere Nahak
Defeza	: Dr. Domingos dos Santos
Desizaun	: Pena prizaun tinan 2 fulan 6 suspende ba tinan 3

Iha 24 Setembru 2025, Tribunál Judisiál Primeira Instánsia Suai, liuhosi julgamentu movel iha Munisípiu Bobonaro, prezide leitura akordaun ba krime kontrabandu ne'ebé envolve arguidu Arcanjo do Carmo hasoru Estadu RDTL, iha Munisípiu Bobonaro.

Akuzasaun Prokuradór

Prokuradór akuza katak iha 01 Feveireiru 2025, oras la apura, arguidu ba iha Fronteira Mota Malibaka hodi hasoru malu ho sidadaun estrangeiru ho naran Maxi hodi sosa sigaru

Surya 12 Slop 40 ho osan US\$450.00 no ESSE slop 25 ho osan US\$350.00 sosa tiha sigaru sira ne'e arguidu hodi mai guarda iha nia uma.

Tuir mai iha 02 Feveireiru 2025, arguidu lori sasan sira ne'e hodi mai faan iha Merkadu Maliana no iha dalan klaran hetan preende hosi Polísia. Arguidu importa sigaru sira ne'e tuir dalan ilegál ho objetivu atu labele selu taxa ba Estadu RDTL liuhosi diresaun Alfandega.

Prokuradór akuza arguida kontra artigu 316 KP kona-ba krime kontrabandu ho moldura penál tinan 2 to'o tinan 6 ka multa.

Produsaun ba prova sira

Iha julgamentu, arguidu konfesa faktu hotu iha akuzasaun prokuradór nian, arguidu deklara katak sosa sasan sira ne'e iha mota sorin tanba nesesidade uma laran nian, arguidu mós deklara katak mai tribunál dala rua ona ba krime hanesan, arrepende ninia hahalok no promete iha futuru sei larepete tan hahalok hanesan.

Depoisde rona deklarasaun arguidu nian, prokuradór konsidera prova suficiente ona nune'e husu ba tribunál atu presinde testemuña ninia depoimentu. Defeza laiha opozisaun ba pedidu ne'e. Bazeia ba pedidu ne'e, tribunál presinde testemuña ninia depoimentu.

Alegasaun finál

Prokurador haktuir katak arguidu konfirma faktu ne'ebé hakerek iha akuzasaun, arguidu konfesa integralmente, arguidu mós deklara katak nia halo asaun ida ne'e tanba nesesidade uma laran nian. Arguidu nia aktu ne'e laos foin dala ida maibé ba dala rua ona nune'e husu ba tribunál fó atu kondena arguidu ho pena prizaun suspende nia ezekusaun.

Entretantu, defeza haktuir katak arguidu konfesa faktu hotu iha akuzasaun, arrepende ninia hahalok no promete sei la komete tan iha futuru, Alende ne'e kolabora di'ak ho tribunál tanba ne'e husu ba tribunál atu fó pena ne'ebé justu ba arguidu tanba arguidu halo asaun ida ne'e tanba nesesidade uma laran nian.

Desizaun

Depoisde avalia faktu hotu, ne'ebé produs durante julgamentu tribunál konsidera arguidu nia hahalok ne'e provadu no priense duni elementu krime kontrabandu tuir akuzasaun prokuradór nian.

Bazeia ba faktu provadu sira ne'e no tetu mós ho sirkunstánsia atenuante sira hanesan, arguidu konfesa, arrepende nia hahalok, no promete sei la komete tan krime hanesan iha futuru, tribunál haree mós ba arguidu nia antesedente kriminál arguidu mai hatan dala rua ona iha tribunál, ho nune'e tribunál konklui prosesu ne'e no kondena arguidu ho pena prizaun tinan rua fulan neen suspende ba tinan tolu.

6. Krime Kontrabandu

Nú. Prosesu : 0017/24.ERATB
Kompozisaun Tribunál : Koletivu
Juis : Dra. Patricia de Araujo F.B. M. Xavier, Dr. Hugo da Cruz Pui,
Dr. Samuel Pacheco
Prokuradór : Dr. Reinato Bere Nahak
Defeza : Dr. Jonas Henrique da Costa
Desizaun : Absolve

Iha 24 Setembru 2025, Tribunál Judisial Primeira Instánsia Suai, prezide julgamentu movel iha Munisípiu Bobonaro ba krime kontrabandu ne'ebé envolve arguida Maria Soares no Odete Soares hasoru Estadu RDTL, iha Munisípiu Bobonaro.

Akuzasaun Prokuradór

Prokuradór akuza katak iha 06 Dezembru 2024, oras la apura, arguida Maria Soares no Odete Soares sosa tabaku ho marka pohon sagu hosi ema deskoñesidu ne'ebé mak faan ba sira iha Merkadu Atabae.

Arguida sira sosa objetu tabaku joker pohon sagu kaixa ki'ik ida sira sosa ho osan US\$5.00 ho kaixa 20 ekivalente ho osan US\$100.00, depoisde sosa tiha arguida sira tula ba kareta ho marka cary ho objetivu atu hodi ba faan iha Dili, bainhira to'o iha Postu UPM Atabae hetan prende hosi Polísia. Objetu tabaku sira ne'e hetan ona validasaun hosi tribunál no dekreta ona ba fim destruisaun tuir despaxu Judisiál.

Prokuradór akuza arguida sira kontra artigu 316 KP kona-ba kontrabandu ho moldura penál tinan 2 to'o tinan 6 ka multa.

Produsaun ba prova sira

Iha prosesu julgamentu, arguida sira deklara katak faktu iha akuzasaun ne'e loos hotu, arguida arrepende sira ninia hahalok no foin primeiravés mai hatan iha tribunál.

Alegasaun finál

Prokuradór haktuir katak arguida sira mezmú konfesa katak sosa duni objetu sira ne'e iha Merkadu Atabae, arguida sira mós la iha kuñesimentu ba objetu sira ne'e hatama liu hosi dalan ilegál, prokuradór entende katak hahalok arguida sira nian ne'e la priense elementu krime kontra bandu, nune'e husu ba tribunál atu absolve arguida sira hosi prosesu ne'e.

Alende ne'e, defeza iha nia alegasaun konkorda ho prokuradór nia alegasaun atu absolve arguida sira hosi krime.

Desizaun

Depoisde avalia faktu hotu, tribunál konsidera faktu ne'ebé akuza ba arguida sira la priense elementu krime kontrabandu tanba arguida sira la halo komunikasaun ho ema Indonézia hodi hatama sasan ilegál mai Timor-Leste, nune'e tribunál konklui prosesu ne'e no absolve arguida sira hosi krime ne'e.

7. Krime kontrabandu

Nú. Prosesu : 0017/24.PDSUA
Kompozisaun Tribunál : Koletivu
Juis : Dra. Patricia de Araújo F.B. M. Xavier, Dr. Hugo da Cruz Pui,
Dr. Samuel da Costa Pacheco
Prokuradór : Dr. Reinato Bere Nahak
Defeza : Dr. Jonas Henrique da Costa
Desizaun : Pena multa US\$60.00

Iha 24 Setembru 2025, Tribunál Judisiál Primeira Instánsia Suai, liuhosi julgamentu movel iha Munisípiu Bobonaro, prezide leitura akordaun ba krime kontrabandu ne'ebé envolve arguidu Carlito Pereira Soares no arguidu Gaudino Monteiro Soares hasoru Estadu RDTL, iha Munisípiu Bobonaro.

Akuzasaun Prokuradór

Prokuradór akuza katak iha 17 Dezembru 2024, iha oras la apura, arguidu na'in rua ba iha Fronteira Mota Mozon baliza entre Timor-Leste ho Indonézia hasoru malu ho sidadaun Indonézia hodi sosa fugeti hamutuk 24 iha Sidadaun Indonézia ho osan valor US\$160.00, hafoin arguidu sira tula ba sira nia motorizada no kontinua atu ba Dili no bainhira to'o iha dalan Tunu Bibi nian hetan para hosi membru Polísia no hetan objetu fugetus halo kedas aprensaun no halo kedas identifikasaun ba arguidu sira.

Konsekuensia hosi arguidu sira nia hahalok hodi hamosu prejuizu ba iha Estadu RDTL.

Prokurador akuza arguidu sira kontra artigu 316 KP kona-ba kontrabandu ho moldura penál tinan 2 to'o tinan 6 ka multa.

Produsaun ba prova sira

Iha prosesu julgamentu, arguidu sira konfesa faktu sira iha akuzasaun no deklara katak objetivu sosa fugetis ne'e tanba besik ona loron bo'ot no atu sunu iha loron bo'ot, arguidu sira mós deklara katak foin mak mai hatan iha tribunál, arguidu sira mós deklara katak depoisde akontese ne'e arguidu sira lahatama ona sasan liu hosi dala ilegál.

Depoisde rona deklarasaun arguidu sira nian, prokuradór konsidera prova sufisiénte ona nune'e husu ba tribunál atu presinde testemuña ninia depoimentu. Defeza laiha opozisaun ba pedidu ne'e. Bazeia ba pedidu ne'e, tribunál presinde testemuña ninia depoimentu.

Alegasaun finál

Prokuradór haktuir katak arguidu sira konfesa integralmente ba aktu ne'ebé sira halo katak sira sosa duni fugetis refere iha fronteira sira hatene katak objetu sira ne'e kontra lei maibé konsiente ho nune'e prokuradór entende katak hahalok arguidu sira nian prienxe duni krime kontrabandu, nune'e husu ba tribunál atu kondena arguidu na'in rua ho pena multa.

Entretantu, defeza haktuir katak arguidu sira konfesa totalmente ba sira nia hahalok ne'ebé sira halo, nune'e defeza husu ba tribunál atu aplika pena multa ba arguidu na'in rua.

Desizaun

Depoisde avalia faktu sira hotu, tribunál prova katak arguidu na'in rua nia aktu ne'e prienxe duni krime kontrabandu, ba faktu provadu sira ne'e hotu tribunál kondena arguidu na'in rua ho pena multa US\$60.00 ne'ebé arguidu sira sei selu US\$1.00 kada loron durante loron 60 nia laran. Tribunál fiksa pena alternativa durante loron 40 iha prizaun bainhira arguidu sira la kumpri pena multa refere.

8. Krime ofensa ba integridade física simples ho natureza VD

Nú. Prosesu	: 0003/25.BBBLB
Kompozisaun Tribunál	: Singulár
Juis	: Dr. Hugo da Cruz Pui
Prokuradór	: Dr. Reinato Bere Nahak
Defeza	: Dr. Domingos dos Santos
Desizaun	: Pena multa US\$60.00

Iha 25 Setembru 2025, Tribunál Judisiál Primeira Instánsia Suai, liuhosi julgamentu movei iha Munisípiu Bobonaro prezide leitura sentensa ba krime ofensa ba integridade física simples ho natureza VD ne'ebé envolve arguidu AH hasoru nia feen, iha Munisípiu Bobonaro.

Akuzasaun Prokuradór

Prokuradór akuza katak iha 15 Feveireiru 2025, maizumenus iha oras tuku 22:00 kalan, arguidu tebe dala rua iha ofendida nia kotuk laran halo bubu no metan. Antes ne'e, ofendida haris iha haris fatin no sira nia oan tanis tuur besik hela arguidu ne'ebé halimar hela telefone, ofendida sai hosi haris fatin foti popok fó hatais ba labarik, arguidu tebe kadeira no halo ofendida hirus no tolok arguidu, nune'e arguidu halo agresaun refere hasoru ofendida.

Maizumenus iha tinan 2024, arguidu tuku dala rua iha ofendida niaulun parte klaran kauza moras no bubu.

Antes ne'e maizumenus iha tinan 2023, arguidu tebe dala ida iha ofendida nia kelen parte karuk.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2,3 (a), 35 (b) no 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktu hotu ne'ebé mak hakerek iha akuzasaun prokuradór nian. Liután arguidu deklara katak husu ona deskulpa ba ofendida di'ak malu ona moris hamutuk nafatin hanesan feen la'en, arrepende nia hahalok no promete iha futuru sei lahalo tan krime hasoru ofendida tanba nia hahalok ne'e lei bandu.

Alende ne'e, ofendida kontinua konfirma faktu sira iha akuzasaun ofendida mós deklara katak arguidu husu ona deskulpa ba ofendida no sira di'ak malu ona, nafatin moris hamutuk hanesan feen ho la'en.

Alegasaun finál

Prokuradór haktuir katak arguidu konfesa integral ba aktu ne'ebé mak nia halo hasoru ofendida, maske arguidu konfesa ne'e hanesan atenuante ida, maibé agravante mós tanba arguidu halo agresaun hasoru nia feen ne'ebé tuir lolos arguidu mak tenke proteze, maibé pelu kontrariu arguidu mak komete fali krime hasoru ofendida, nune'e husu ba tribunál atu kondena arguidu ho pena multa.

Entretantu, defeza haktuir katak iha perante tribunál arguidu konfesa, di'ak malu fali ona, nafatin moris hamutuk hanesan feen ho la'en, nune'e defeza entende katak iha futuru sei la akontese, tanba ne'e husu ba tribunál atu fó pena multa tuir arguidu nia kbiit.

Desizaun

Hafoin avalia faktu hotu, tribunál prova katak arguidu tebe dala rua iha ofendida nia kotuk laran rezulta bubu no metan, tebe dala ida iha kelen parte karuk no tuku dala ida iha ofendida nia ulun rezulta moras.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$60.00 ne'ebé arguidu sei selu 0,50 sentavus kada loron durante loron 120. Tribunál mós fiksa pena alternativa durante loron 80 prizaun, bainhira arguidu la kumpri pena multa refere.

9. Krime ofensa ba integridade fizika simples ho natureza VD

Nú. Prosesu	: 0001/25.BBBBV
Kompozisaun Tribunál	: Singulár
Juis	: Dr. Hugo da Cruz Pui
Prokuradór	: Dr. Renato Bere Nahak
Defeza	: Dr. Domingos dos Santos
Desizaun	: Pena multa US\$120.00

Iha 25 Setembru 2025, Tribunál Judisiál Primeira Instánsia Suai, liuhosi julgamentu movel iha Munisípiu Bobonaro prezide leitura sentensa ba krime ofensa ba integridade

fízika simples ho natureza VD ne'ebé envolve arguidu BMdN hasoru nia feen, iha Munisípiu Bobonaro.

Akuzasaun Prokuradór

Prokuradór akuza katak iha 14 Feveireiru 2025, iha oras tuku 20:00 kalan, ofendida simu telefone hosi Sra ne'ebé mak antes ne'e ofendida empresta ninia osan nune'e arguidu hadau telefone hodi ko'alia ba ofendida dehan "ó empresta ema nia osan la fó hatene hau," no ofendida hatan katak "ó blok hotu hau nia número telefone oinsa mak hau bele fó hatene". Ho nune'e arguidu tuku dala neen iha ofendida nia kotuk laran no tuku dala haat iha ofendida nia kanuruk, tebe dala neen iha ain parte loos no karuk no basa dala ida iha hasan parte loos rezulta moras no bubu.

Konsekuensia hosi arguidu nia hahalok ne'e halo ofendida senti moras iha kabaas parte loos no bubu iha matan parte loos.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3 (a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu balun loos no balun la loos, arguidu deklara katak faktu ne'ebé loos mak arguidu basa dala rua iha ofendida nia hasan parte loos no parte karuk, arguidu deklara katak kona-ba tuku no tebe ne'e la loos, arguidu haktuir katak baku ofendida tanba durante serbisu iha Inglatera ne'e haruka hela deit osan ba ofendida, maibé ofendida kontinua deve tutan ema nia osan nune'e arguidu halo agresaun hasoru ofendida, arguidu deklara katak foin mak mai hatan iha tribunál, arrepende ninia hahalok no promete sei lakomete tan krime hasoru ofendida no ema seluk iha futuru.

Entretantu, ofendida deklara katak arguidu basa dala rua, kona-ba faktu sira seluk ne'e momentu ne'eba nervoju nune'e naran ko'alia de'it iha polísia. Ofendida deklara mós katak depoisde akontesementu ne'e arguidu husu kedas deskulpa ba ofendida.

Alegasaun finál

Prokurador haktuir katak arguidu konfesa parsial ba faktu iha akuzasaun no ofendida mós deklara katak arguidu basa dala rua de'it ofendida nia hasan, prokuradór haree katak aktu arguidu nian ne'e provadu tuir artigu 145 KP, nune'e husu ba tribunál atu kondena arguidu ho pena multa.

Entretantu, defeza iha nia alegasaun haktuir katak arguidu basa dala rua iha ofendida nia hasan, arguidu ho ofendida mós di'ak malu fali no to'o ohin loron la halo tan krime hasoru ofendida nune'e husu ba tribunál atu kondena arguidu ho pena multa.

Desizaun

Depoisde avalia faktu sira hotu, tribunál prova katak arguidu basa dala rua iha ofendida nia hasan parte karuk no parte loos. Kona-ba faktu sira seluk tribunál konsidera la provadu, bazeia ba deklarasaun arguidu ho ofendida nian.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena multa US\$120.00 kada loron sei selu US\$1.00 durante loron 120. Tribunál mós fiksa pena alternativa durante loron 80 iha prizaun bainhira arguidu la kumpri pena multa refere.

10. Krime ofensa ba integridade fizika simples ho natureza VD

Nú. Prosesu : 0003/25.BBMVL
Kompozisaun Tribunál : Singulár
Juis : Dr. Samuel Pacheco
Prokuradór : Dr. Simião Brites Seixas
Defeza : Dr. Domingos dos Santos
Desizaun : Pena multa US\$30.00

Iha 25 Setembru 2025, Tribunál Judisiál Primeira Instánsia Suai, liuhosi julgamentu movel iha Munisípiu Bobonaro prezide leitura sentensa ba krime ofensa ba integridade fizika simples ho natureza VD ne'ebé envolve arguidu MMB hasoru nia feen, iha Munisípiu Bobonaro.

Akuzasaun Prokuradór

Prokuradór akuza katak iha 14 Marsu 2025, iha oras 17:00 lokraik, ofendida atu ba sosa rinsu iha kioske, ofendida haree arguidu tuur hela iha Sra. Mafalda nia kioske nia oin, ofendida nervozu no hakilar ba arguidu hodi dehan “durante ne'e ó la ba serbisu ida ó mai tuur hein ema nia inan ne'e nia kioske,” nune'e ofendida foti fatuk tuda arguidu maibé la kona no arguidu nervoju hodi rasta ofendida nia liman fila ba uma hodi tuku tan dala tolu iha ofendida nia hasan parte loos rezulta moras no raan sai no ofendida halai sai hosi uma ba apresenta keixa iha Polísia.

Prokuradór akuza arguidu kontra artigo 145 KP kona-ba ofensa ba integridade fizika simples ho moldura penál to'o tinan 3 ka multa no konjuga ho artigo 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu sira iha akuzasaun, arrepende ninia hahalok foin mak mai hatan iha tribunál no depoisde akontese arguidu la halo agresaun hasoru ofendida, di'ak malu fali ona.

Depoisde rona deklarasaun arguidu nian, prokuradór konsidera prova sufisiénte ona nune'e husu ba tribunál atu presinde ofendida ninia deklarasaun. Defeza laiha opozisaun ba pedidu ne'e. Bazeia ba pedidu ne'e, tribunál presinde ofendida nia deklarasaun.

Alegasaun finál

Prokuradór haktuir katak arguidu konfesa totálmente ba aktu ne'ebé mak nia halo hasoru ofendida, prokuradór entende katak hahalok sira ne'e provadu hotu nune'e husu ba tribunál atu kondena arguidu tuir konviksaun tribunál nian.

Entretantu, defeza haktuir katak arguidu konfesa faktu sira hotu, foin mak mai hatan iha tribunál no depoisde akontese to'o agora laiha tan problema seluk, nune'e defeza husu ba tribunál atu fó pena multa ne'ebé kmaan ba arguidu.

Desizaun

Depoisde avalia faktu sira hotu, tribunál prova katak arguidu nia aktu ne'e prienxe duni krime ne'ebé akuza ba arguidu.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena multa US\$30.00, ne'ebé arguidu sei selu 0.50 sentavus kada loron, durante loron 60. Tribunál mós fiksa pena alternativa durante loron 40 iha prizaun, bainhira arguidu la kumpri pena multa refere.

11. Krime ofensa ba integridade fízika simples ho natureza VD

Nú. Prosesu	: 0041/25BBMLV
Kompozisaun Tribunál	: Singulár
Juis	: Dr. Samuel Paecheco
Prokuradór	: Dr. Simião Seixas Simoes
Defeza	: Dr. Domingos dos Santos
Desizaun	: Pena prizaun fulan 5 suspende ba tinan 1

Iha 26 Setembru 2025, Tribunál Judisiál Primeira Instánsia Suia, liuhosi julgamentu movel iha Munisípiu Bobonaro, prezide leitura sentensa ba krime ofensa ba integridade fízika simples ho natureza VD ne'ebé envolve arguidu NM hasoru nia feen, iha Munisípiu Bobonaro.

Akuzasaun Prokuradór

Prokuradór akuza katak iha 17 Marsu 2025, iha oras tuku 22:00 kalan, arguidu lori lampra baku dala haat iha ofendida nia ulun no kontinua tuku dala rua iha ofendida nia kanuruk.

Iha 03 Janeiru 2025, iha oras tuku 14:00 meiudia, arguidu lori ai-kabelak ida baku dala rua iha ofendida nia kotuk laran.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3 (a), 35 (b) no 36 LKVD.

Produsaun ba prova sira

Iha prosesu julgamentu, arguidu konfesa integral ba faktu hotu iha akuzasaun no deklarara katak arguidu ho ofendida moris separadu ona desde problema ne'e akontese, ofendida

ba hela ona ho nia inan aman, arrepende ninia hahalok no promete sei lakomete tan krime hasoru ofendida no ema seluk.

Alende ne'e, ofendida kontinua konfirma faktu sira iha akuzasaun no deklara katak sira moris separadu ona.

Alegasaun finál

Prokuradór konsidera arguidu provadu komete krime hasoru ofendida, bazeia ba konfisaun arguidu nian no konfirma mós hosi ofendida. Mezmu arguidu konfesa, arrepende nia hahalok maibé atu halo prevensaun, prokuradór husu ba tribunál atu kondena arguidu ho pena multa.

Entretantu, defeza haktuir katak arguidu konfesa integral ba faktu iha akuzasaun, arrepende nia hahalok. Tanba ne'e husu ba tribunál atu kondena arguidu ho pena ne'ebé kmaan.

Desizaun

Depoisde avalia faktu sira hotu tribunál konsidera faktu hotu iha akuzasaun prokuradór nian provadu hotu.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena prizaun fulan lima suspende ba tinan ida.

12. Krime ofensa ba integridade fizika simples ho natureza VD

Nú. Prosesu	: 0022/23.BBQLC
Kompozisaun Tribunál	: Singulár
Juiz	: Dr. Hugo da Cruz Pui
Prokuradór	: Dr. Simião Brites Seixas
Defeza	: Dr. Domingos dos Santos
Desizaun	: Pena prizaun fulan 9 suspende ba tinan 1

Iha 26 Setembru 2025, Tribunál Judisiál Primeira Instánsia Suai, liuhosi julgamentu movel iha Munisípiu Bobonaro prezide leitura sentensa ba krime ofensa ba integridade fizika simples ho natureza VD ne'ebé envolve arguida IMS hasoru nia la'en, iha Munisípiu Bobonaro.

Akuzasaun Prokuradór

Prokuradór akuza katak iha 01 Novembru 2023, iha oras tuku 17:00 lokraik, iha arguidu no ofendidu sira nia uma arguidu foti katana nia kaer fatin hodi tuku ba ofendidu nia reen-toos kauza kanek no raan sai barak. Antes agrasaun ne'e, ofendidu husu osan ba arguida maibé arguida la fó nune'e sira diskute malu arguida norvozu no komete aktu ne'e hasoru ofendidu.

Prokurador akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguida konfesa faktu hotu iha akuzasaun no deklara katak arrepende ninia hahalok, no foin mak mai hatan iha tribunál, arguida mós promete iha futuro sei la komete tan krime hasoru ofendidu.

Depoisde rona deklarasaun arguida nian, prokuradór husu ba tribunál atu presinde tiha deklarasaun ofendida nian ho konsiderasaun katak arguidu konfesa faktu hotu iha akuzasaun nune'e prova sufisiénte ona. Relasiona ho pedidu ne'e, defeza laiha opozisaun. Tribunál bazeia ba pedidu ne'e konklui hodi presinde ofendidu nia deklarasaun.

Alegasaun finál

Prokuradór haktuir katak arguidu konfesa integralmente ba aktu ne'ebé mak nia halo hasoru ofendidu, prokuradór entende katak hahalok sira ne'e provadu hotu nune'e husu ba tribunál atu kondena arguida tuir kompetensia tribunál nian.

Entretantu, defeza haktuir katak arguida konfesa momós ba aktu ne'ebé mak nia halo hasoru ofendidu, arguida ho ofendidu di'ak malu ona moris hamutuk nafatin hanesan feen ho la'en nune'e parte defeza husu ba tribunál fó pena multa ba arguida.

Desizaun

Hafoin avalia faktu hotu, tribunál konsidera faktu hotu iha akuzasaun prokuradór nian provadu hotu.

Bazeia ba faktu provadu sira ne'e hotu no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena prizaun fulan sia suspende ba tinan ida.

Atu hetan informasaun liutan favór kontaktu:

Ana Paula Marçal
Diretora Ezekutiva JSMP
Telefone: 3323883/77040735
Diresaun e-mail: ana@jsmp.tl
info@jsmp.tl
Website: <http://jsmp.tl>

